

四庫全書

集部

欽定四庫全書

集部

元詩選二集卷二

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣萬培成

欽定四庫全書

元詩選二集卷二

庶吉士顧嗣立編

白州判珽

珽字廷玉錢唐人八歲能賦詩長習為科舉業  
轟然有聲場屋間宋亡後客授藏書之家晝緒  
夜誦燈墜花穴帽不知也丞相巴延程承旨鉅  
夫劉中丞伯宣前後交薦辭不赴李文簡公衍  
力起之授太平路儒學正未幾攝行教授事尋

轉常州路教授陞江浙等處儒學副提舉秩滿  
署淮東鹽倉大使謝事養疴海陵再遷蘭溪州  
判官致仕結廬西湖之金沙灘有泉自天竺來  
及門而匯榜之曰湛淵因以自號晚歸老棲霞  
又號棲霞山人以天曆元年卒年八十一所居  
多竹先是一竿上歧為二人皆異之賦雙竹杖  
詩未幾而歿廷玉有二子蓋先兆也所著曰湛  
淵集剡源戴帥初評其詩甚似渡江陳去非而

嘗諱言去非其賦銅浮漚一篇尤清馴可念紫  
陽方萬里稱其冠絕古今有英雄大丈夫氣廬  
陵劉會孟謂其不為雕刻苛碎蒼然者不惟極  
塵外之趣兼有雲山韶濩之音皆確論也

吳季子墓

聖人如日月下照無黨私藏珠與韞玉所得自華滋恭  
惟吳季子夙稟明睿姿近取子臧節遠紹泰伯基兩以  
大國讓廉風起蠻夸觀樂義已燭挂劔心如飴時方尚

詐力子獨怙且祇時方事寇攘子獨甘棄遺孔子不到  
吳聞風重齋咨佳城介申浦采地亦在茲特書寄餘哀  
豈不遐邇思蜿蜿龍蛇翦皎皎星日垂禹世懷道義取  
舍實繫之寄言邦之人無但峴首悲

題斬蛟橋

桓桓周將軍英烈照千祀少年知自艾成仁不惜死射  
虎南山下斫潛北橋底騰挈三日夜瀝血四十里激波  
為嶽立揮刃電亦駛想當批鱗初見義不見水及其立

人朝矯矯中不倚文學既英發武事復霆起殲兒善醜  
正甘作忠義鬼至今有生氣耿耿耀青史蘇公百世豪  
氣味有相似泊舟蛟川下洗石題所以平生疾惡意十  
有二言裏豐碑刻祠宇詞翰晉二美二美固足珍吾取  
不在是

同陳太傅諸公同登六和塔

龍山古化城浮屠峙其巔開殿生妙香金碧森貝筵應  
真儼若生倒飛青金蓮頭陀紺林叢導我丹梯緣初猶

藉佛日闕境儵已玄回頭失誰何叫嘯衣相牽且復忍  
須臾當見快意天嬌兒詫先登網戶相鈎連炯若蟻在  
珠九曲隨盤旋爛爛滄海開落落雲氣懸羣峰可俯拾  
背閱黃鶴騫竒觀興懦夫便欲凌飛仙絕頂按坤維始  
見南紀偏神京渺何許王氣須停躔舟車集百蠻島嶼  
通人烟一為帝王州氣壓三大千剛風灑毛髮鐸語空  
蟬聯紅紅杏花園媿乏慈恩篇

冷泉亭



靈山本清淨一泉澗其中靈山孤飛來此水將無同山  
影厭不盡照見天玲瓏分明千尺冰不獨疑寒蟲京洛  
多風塵到此一洗空炎寒無二心凜有操者風留然守  
空梵萬劫豈終窮驪山有溫泉虛築華清宮

題松雪臨郭河陽溪山漁樂圖

遠山近山何歷歷下有長溪橫一碧溪中亦有釣鼇手  
此手不遮長安日野橋烟樹接草廬飛流如練懸空虛  
截山白雲凝不去要人寫作巖居圖

河南婦

按輟耕錄云河南婦世為河南民家元兵下江南婦被虜姑與夫行求數年得之河

南婦已妻千戶某饒于財情好甚洽視夫姑若塗人會有旨凡婦人被虜許銀贖敢匿者死某懼罪亟遣婦歸堅不行夫姑留以俟婦聞其室弗與通遂號慟頓絕而去行未百步青天無雲而雷回視

婦已震死

從軍古云樂獲罪禱應難母望明珠復夫求破鏡完押  
衙逢義士公主奉春官為報河南婦天刑不可干

春日田園雜興

雨後散幽步邨邨社鼓鳴陰晴雖不定天地自分明柳

處風無力蛙時水有聲幾朝寒食近吾事及躬耕

月泉吟社

評曰前聯不束于題柳處蛙時一聯題意俱足格調甚高結亦不浮

### 山中懷友

幾年音問絕此夕更關情寒雨人孤坐殘燈鴈一聲干  
戈猶故國貧病自空城惟有琴堪訴愁深彈不成

### 清和

白苧漸相便因知物候遷空山一雨後小檻綠陰前鶯  
在留春思人幽減晝眠此時風日好元不似梅天

餘杭四月

四月餘杭道一晴生意繁  
朱櫻青豆酒綠草白鵝村水  
滿船頭滑風輕袖影翻幾家  
蠶事動寂寂畫門關

遊宜興張公洞

天開福地據雄尊  
果老張公幾代孫  
一竅通天纔直上  
千崖轉日已平吞  
山頭白鶴來無影  
石上青驪去有痕  
我欲放身如脫屣  
仙凡一轍隔重閣

淨慈禪寺

奎額昭回龍屈盤入門已覺厭塵寰何當白髮三千丈  
來寄清風五百間帝子金搖金漱濫家人卦剔翠孱顏  
西湖日日船如織半在南屏第一山

湖樓玩雪

上湖十里卷簾中幻出瑤華第一宮山勢蹴天銀作浪  
柳行撲地玉為虹漁蓑鶴氅同為我爵舌羊羔不負公  
明日鳳城朝退蚤一鞭曾約試吟驄

酒邊贈朱處士

烏葛唐巾白苧裘。埽庭終夕共淹留。醉中談論心猶壯。  
老去歌歡淚亦流。對客呈詩如獻佛。課兒收橘當封侯。  
明年好理西風櫂。重約三吳爛漫遊。

遊天竺寺

山轉龍泓一徑深。嵐煙吹潤撲衣巾。松蘿掩映似無路。  
猿鳥往來如有人。講石尚存天寶字。御梅嘗識建炎春。  
城中遮日空西望。自與長安隔兩塵。

竹陰

占斷人間瀟灑地全身水墨畫簷非煙非霧一林碧  
似雨似晴三徑涼翠袖佳人點空谷白鬚道士隱南塘  
數竿醉日君須記移向西軒補夕陽

題蘇東坡書楚頌並菩薩蠻滿庭芳詞卷後

南荒九死幸生還種樹書成手自刪赤壁夢難同楚頌  
洞庭樂不減商山人生隨地少如意老子對天無媿顏  
千古菟裘有遺恨斷圭殘璧自人間

續演雅十詩

海青羽中虎燕燕能制之小隙乘大舟關尹不吾欺海青

俊禽也而羣燕緣撲之即墜物受於所制者無小大也

草食押不蘆雖死元不死未見滌腸人先聞棄箒子北漢

有名押不蘆食其汁立死然以他藥解之即蘇華佗洗腸胃攻疾疑先服此

誰令珠玉唾出彼藜藿腸仁人不為寶良賈宜深藏和林

有尼能吐珠玉雜寶

嬰啼聞木枝羝乳見茅茹何如百年身反爾無根據北漢

種羊角能產羊其大如兔食之肥美嬰啼木枝見山海經所載



西狩獲白麟至死意不吐代北有角端能通諸國語

北地異獸也能人言其高如浮圖

纔脫海鶴啄已登方物輿仰面勿啾啾我長非僑如小

長僅七寸夫婦二枚形體畢具

羯尾大如斛堅車載不起此以不掉滅彼以不掉死

西漢

有羯尾大於身之半非車載尾不可行

八珍殺龍鳳此出龍鳳外荔支配江蚺徒誇有風味

謂

北八珍也所謂八珍則醍醐盧沉野駝蹄鹿肩駝乳糜天鵝炙燕玉漿玄玉漿也玄玉漿即馬奶子

灤人薪巨松童山八百里世無奚超勇惆悵度易水

取松

煤於灤陽即上都去上都二百里即古松林千里其大十圍居人薪之將八百里也

兩駝侍雪立終日飢不起一覺沙日黃肉屏那足擬沙

雪盛命兩駝跌其旁終夜不動用斷梗架片積其上而寢處於下煖勝肉屏且不起心兵也

### 積金峰訪梁道士

驚羽穿林看細碎健輿繞石聽敲斜道人住近茅峰北  
一簇樓臺五色霞

### 湖居雜興八首

御舟初出賞春菲傳是諸王與后妃香霧漸深蓮幕暗  
日斜惟見澹黃衣

脈脈吹香屋角梅背風移燭小簾開鳳城幾日元宵近  
一片簫聲水上來

龍舟曉發斷橋西別有輕舟兩兩隨春色可人晴較穩  
酒家爭出柳梢旗

相國平泉水竹居吳中花石世間無遊人馬上休回首  
一半春風在裏湖

雨後林塘夏亦秋一葫蘆酒在船頭醉來深入荷花去  
臥看青天飛白鷗

三賢猶得仰高風冠服雖殊氣味同後五百年無繼者  
桃花含笑夕陽中

車魚人散水風腥雨色涼分柳外晴回首夕陽都落盡  
忽然東向數峰明

萬樹芙蓉兩蕊宮秋風開遍水邊叢白牆遮盡紅牆出  
只見紅牆一半紅

翔泳堂酒中

環辭度得雪兒歌濃墨斜書碧玉柯醉折芙蓉薰酒盞  
裏湖涼似外湖多

題江貫道百牛圖

幾年散放桃林後餘四百蹄猶可騎攬鏡挂書多事在  
能騎唯有一凝之

題龔翠巖中山出遊圖

何處張弧思一車中山曾見夜菟圖  
棼棼眼底朱成碧

後乘鍾家有此姝

玉清宮與趙達夫鮮于樞聯句二首

湖田漠漠水禽飛

達夫

堤柳斜斜帶夕暉

樞

二月江南

好天氣

珽

初陽臺上愜春衣

巾子峰頭棹釣船

達夫

初陽臺上坐鳴絃  
出雲高樹明

殘日

珽

過雨蒼苔泣細泉  
絕俗誰能繼  
遐躅

樞

凌空我

欲學飛仙

達夫

還家正恐鄉人問

珽

化鶴重來知幾年

樞

山居懷林處士

昔在林處士結廬鄰峰顛年年不入城梅花有佳聯童  
鶴三數口負郭十畝田弟姪列朝裾忒平好時年人品  
既已高奉養常充然嗟我何為者日用買山錢愛詩不  
能佳未了區中緣空有一寸心羨殺處士賢飽看貴人  
面不若飢看天推牀呼伯雅且此相周旋有田足幾時  
卓哉坡翁言

蛾眉亭

秦赭鑿填石不受鞭箠考零落楚江許相峙蠹三島穿  
松得細逕據一陵二小奔流浩浩來五色爛華藻至寶  
地不措絕境天所造誰言兩蛾黛功奪京兆巧終朝對  
顰蹙似為今古惱然犀磯沈沈跨鯨月皎皎絲綸三千  
丈蒙衝百萬權天風吹過夢多憂只空老今者吾與子  
所愜在幽討供帳莫怱怱槃觴從草草雅琴鼓一再領  
此風日好臨崖發清嘯倚樹或闕倒禮存玉帛外縱弛  
或一道興極不知歸白漚破晴昊



李翰林墓

出城得佳山兩峰特竒詭一如植躬圭一峰拱而侍我  
見猶愛之而况謫仙子孤墳在其下政爾直一死謫仙  
真天人出處見諸史豈敢傲吾君辛苦植唐祀嗟予侷  
侷者塵土正如此停車不忍發載拜願有泚仰止青山  
高清風與終始孰謂千載人不在天地裏

贈張知府周卿

人品中原說此翁雄文直氣耿心胷幾年天上張公子

今日雲間陸士龍來暮已聞歌五袴平反何翅祿千鍾  
相從媿落諸公後拭目西巖第一峰

贈青龍任月山

傾蓋相逢意已親風流儒雅邁同倫曾來東閣觀奇士  
又向西湖見偉人放櫂小溪梅皦皦敲棋深院燭燐燐  
懸知後夜相懷切帆落胥山月一輪

題如鏡淨講師房

娛老林房世路賒塵埃飛不到袈裟西湖草木雖同土

北寺煙霞自一家靜啟白扉翻貝葉閒輸赤仄養椒花  
鑑光炯炯輝今古身後何須用五車

春日重過如鏡上人房

憶昔敲門賦瑞筠鹿園佳話又重新屋頭能拓三三徑  
林下知非陸陸人鑿沼何須晉康樂種蓀還憶楚靈均  
老師鍊得心如鏡更把高臺比月輪

龔提舉璠

璠字子敬宋司農卿湛之子自高郵再徙平江

家焉宋亾例遣北上隄行至莘縣不食卒璠悲不自勝嘆曰國亾家破吾兄弟不能力振門戶獨不可為儒以自奮邪與其弟理刻苦于學戴帥初仇仁近胡汲仲皆與為忘年交聲譽藉甚人稱曰兩龔以比漢兩龔云憲使徐琰辟置幕中舉和靖學道兩書院山長當事者交章薦空在館閣不報調寧國路儒學教授遷上饒簿改空春丞歲餘乞休遂以江浙儒學副提舉致仕

卒其所作詩曰存悔齋藁明朱性甫錄補遺十  
七首出自荻溪王氏所藏子敬少時嘗有咏史  
詩云文若縱存猶九錫孔明雖死亦三分為一  
時所傳誦其序表靜春集云通甫與予交上下  
古今一返諸性情之正其于持論如此

詠岳王孫縣尉復栖霞墓田

岳鄂諸孫復墓田清明寒食起新煙道傍為我除蒼檜  
山下如今哭杜鵑高廟神靈應悔此中原父老尚悽然

西湖靡靡行人去却望栖霞轉可憐

嘉定州道中寄庶齋

客夢孤雲散漁翁一帆投人行江路晚花繞槿籬秋有酒誰同醉還家此暫畱中年髮盡白豈必為離憂

送漕府王子方經歷

燕北吳南一萬艘順風天外翼鴻毛碧濤渺渺雲帆穩紅腐陳陳廩粟高此日朝廷多妙選何人幕府最賢勞共知餉饋須劉晏且為明時坐省曹

次黃仲堅教授江灣行

滄海蜃化樓臺生瑣碎一一不可名夜如何其夜六更  
是中精異方冥行忽然鍾鼓聲轟鏗我憐混沌死未覺  
濁惡泥沙埋齷齪珠璣金碧視性命黷貨聊堪付官權  
洞房蛛網鏤象牀重門蘇鋪撼倉琅魂兮歸來知在亾  
縱令僵立倚橋柱忍見逝者相為忙百爾君子須遠猷  
公私慢箴多後憂官庫訶護竟失守豈以尤物無庸畱  
傳聞頃刻飛煙塵天奪鬼偷希世珍重雲寶構亦變滅

况復區區迷幻身積蘇累塊驚盲人

偕林彥達天平卽事

籃輿過西郊故指長松樹幽尋得清深古藤蛟蛇聚聊  
為取徑來復作尋澗去峩峩天門山僧坊掩其處稽首  
忠烈祠茲游有神助違世常獨行會心有同趣手斟白  
雲泉一洗儒者腐躋攀龍門上滄海欲竟渡狂嘯風雨  
飛血肉那可住俯觀大千界莽蒼盡回互病夫杖藜還  
數息安窘步之子凌絕頂相失不可遇俯廊把臂笑物



色方受句跣跌贊公房茶甌要滾注寒子每多艱沮洳  
沾兩屨肩僕亦已痛重負寧少恕前途更回首空翠洒  
嵐霧持此將安歸濟勝自非具知津問長沮無淚洒羊  
祜平生樽酒期中秋月當戶

題劉文偉府判收藏山莊夜歸圖

盤桓長松樹莽蒼歸薄暮惟應門外山見我蹇驢去冷  
泠野水聲候子莊上路亦有東鄰僧分臥清寒處

游桃花塢次郭祥卿陸友元

三月西城多少花  
暖風吹雨過晴霞  
海棠昨日開時路  
山鳥清陰到處家  
長袖挽春攜手去  
小輿舁醉一肩斜  
閒人好在江湖酒  
只辦年年賞物華

春日寄懷書臺

閭門柳如帶中有別離在  
當時官河船飄搖忍相待  
二月東風吹莫寒  
追送百里問河干  
破屋殘燈人去住  
欲語不語千萬端  
竹雞鈎翰啼夢闌  
九山道中雨漫漫  
已恨金華六年別  
當時再鼓荆江楫  
七年又恨瀟湘闊  
人

生負窶北門憂我一思之生白髮白髮生何足驚志士  
潦倒俱無成酒澆磊砢澆不平況復不飲難為情長歌  
短歌無新聲念我獨兮在吳城今年石湖好清明每樹  
梨花香雪晴夫君不來湖上亭昨朝見家信紙尾煩相  
問是親不可踈既遠不可近此身江海事多違往往舊  
交零落盡我亦徘徊看舞謳誰家歡宴及春游越王郊  
臺踏芳草危絃二七彈箜篌箜篌嘈雜兒女語繡柱朱  
絃生眼霧感物逢時重懷古悠悠我行處總是衰遲路

待君歸來問君故  
各天一涯水東注

虞韶卿以謝疊山請謚立祠北上

萬疊山中足舊聞  
只今誰使意勤勤  
周人頗義伯夷事  
晉代行收諸葛文  
九死本無榮謚願  
一香終為老師焚  
黃金臺上逢知己  
袖有江東日暮雲

次鄭僉事送干壽道之慈湖長

樽酒南薰別意涼  
慈湖宛在象山陽  
人生莫恨書檠短  
地褊何堪舞袖長  
親舍雲飛千里白  
客篷雨漲一川黃

昔賢了了經行處草木畱君發舊香

畱岳仲遠處欲歸賦

客懷迷積陰歸夢理前路篠岸散清漪秧疇生綠霧蚓  
鳴沮洳夜鳩喚蒼茫曙我本江海人安得扁舟去

吳儂行

吳儂畏雨如畏虎不道梅霖是時雨江湖占水多作田  
雨來水漲無堅土年年相戒築岸圍州縣施行督田主  
紛紛何益耕者勞鬻鬻還聽踏車鼓鄉風種麥屬農家

拾穗泥中鍊不舉公私上下望西成兒女插秧深沒股  
饑荒却憶四年前百貨如今尚高估惟有斗米八十錢  
雖賤傷農未為苦此事猶應費將護因民所利物無迂  
諸賢鍊石天可補肯使窮櫛怨寒暑

偕陸季道錢德鈞陸友元葉彥思張仲容飲府庠  
荷花池上旣而又自韓園至鄧覺非家飲觀蓮分  
得色字韻

清樽如有期初涼意俱適肯來寂莫濱菡萏亦浮植陶

然轉乘興徑度一圃碧遙指城南家臨水更展席酒狂  
易為仙風便香堪食空宇無能塵物我皆醉色誰言鬢  
已秋始得痛飲力願將花上露為洗坐中客

題丁生所藏錢舜舉山水

寒溪淡無魚扁舟小如屐舉世相為浮更用一篙力畫  
彼山中人憇此松下石

病起試筆十韻

積雨迷空闊翩翩多去舟將家值卑溼無事得清幽安

石非高臥文園已倦游壯心釋如意短髮寄搔頭病約  
山容瘦閒窺鴈影浮雙扉寒自語一榻淡相留香篆紫  
紆晚畫屏瀟灑秋黃花荒古道白日起滄洲不死千金  
藥平生百尺樓暫分仙枕夢遙訪羽人丘

掘山藥歌

綠薜紫藤緋色子種玉綿延春透髓晴虹歲晚寒不起  
託命長鏡山谷裏小隱牆東塹藥闌剝土政得方槃藥  
服食相傳養生訣茂陵劉郎和露啜



題鄭子實著色溪山漁樂圖

東風忽來吹綠雨  
閒雲更學芡花舞  
山中之人歸未歸  
溪上漁翁泛春渚

題小米雲山

分流岡下石門灣  
日日白雲如此山  
薄暮米墳松檻暗

扶筇曾與一僧還

元章以下數世皆葬分流東西東為石門則予先隴所在也故云

題荆公詩後  
上有覽社文房印  
乃吾祖遺書散落  
者十餘年前  
子中弟得之書來相報  
今不能共觀

聊書其後

憶子書來說買書印章驚認却  
灰餘松風小牖秋如夢  
淡墨踈行淚滿裾

焦山

還鄉白髮鍊丹臺  
世外襟懷渺渺開  
山與江傾橫海立  
人隨秋迴御風來  
石公渡口扁舟在  
鐵甕城頭斷角哀  
展轉闌干凭萬古  
少年自許拔塵埃

洛社東泊

放舟山水間舟上載青山薄暮臨溪坐青山相對閒

南墅散步

散策忘遠近看雲孤野夕履石冰澗瑄綠岡松林黑紛  
紛車輪後宛宛崎嶇迹矯身一延佇金彩鱗西魄遐思  
動盈抱百年會有息人生信少娛道心常自得山中樵  
者歸舍南炊煙直焉知同歲暮亦有還鄉客

六月

六月涼如冰熨齒枇杷移陰碧書几風勻書葉蠶軍紙

金少已入三言  
卷二  
語默無窮岸巾起我思古人望逸軌遙山巖巖作清峙  
百年幾何北窗裏宇宙不滿平生喜

空心亭分韻得旭字

常建  
題處

依微轉樵徑更上虞山麓閒尋昔人詩自悟禪房宿野  
木蔭花氣幽潭得山綠日日空心亭山僧愛朝旭

題翠禽畫

一曲寒塘漾夕暉珍禽照影惜毛衣非魚也自知魚樂  
不肯花前掠水飛

浮圖山莊冬夜

山田得秋稔農家共欣欣里社競簫鼓吾生愧鋤雲  
航書歲云晏五十更無閒古今轉難通何能筋力勤  
緬茲寤寐懷擁爐取微燠荒村雞鳴遠不知遙夜分  
可憐獨轆車徑度長岡雲賣薪者誰子低回日寒斂  
曠望城中塵天地方網緼

元貞乙未予賦詩有爛游吾欲首斜川之語于是  
延祐乙卯二十年矣正月三日與猶子永誦淵明

詩憶舊事恍然如為今日設將男昏女嫁少文之  
願儻遂乎

一語怱怱二十年爛游吾欲首斜川今朝開歲忽五十  
稚子誦詩驚醉眠元亮歸來殊未晚買臣富貴政堪憐  
名山五岳無窮意浩蕩春風白髮前

謝陳壺天惠蟹

寒蒲縛來腸已無枯骨裹肉肉自腴為君喚醒江湖夢  
孤蓬細雨聲相濡貧家不辦滿眼沽糟牀漚漚一作漚  
頭酒滴

紅真珠起來為立

一作  
獨坐

西風裏一徑晴寒菊數株

讀漢書

張湯多巧詆公孫但從諛甚惡刀筆吏亦鄙章句儒在  
廷無黨偏惟有汲長孺徒為右內史幾以不悅誅武帝  
欲云云顧問當何如陛下內多欲奈何效唐虞申生言  
力行較之得皮膚惜不能用黯為御史大夫丞相取克  
位不用董仲舒對策最純正尚憂書自書六經曰表章  
儒效舊闕疏治道固有本千載一長吁

用元微之寄樂天韻奉懷元晦

時予從徑山晦機在澗西憲獄

十宵九夢遣分身，世事翻騰可具陳。  
天意何時能悔禍，吾徒到處不如人。  
雨聲歷歷侵殘夜，風物淒淒入小春。  
縮地無方臂不羽，倚樓東望獨傷神。

一作神欲無

郭祥卿同游虎丘

以下五首朱性夫補遺

弱植有緩步，同游無雜賓。  
清陰山寺古，紅樹石楠春。  
丘隴埋吳國，園林閱晉人。  
不應繫舟處，猶是去年津。

吳中寒食



寒食清明賣酒家酒瓶亂插紅白花江南蠶子非一種  
日暖蜂房報午衙八十漁翁罾半破往來醉客路三叉  
村中女伴無忙事疎雨小塘收漾紗

馬虛中柳城春色圖

城中塵頭十丈高欲畫春風風怒號佩霞仙人騎鶴背  
却度太虛觀樂郊當時丹青爭出色借與天公動搖碧  
上流老子餘舊踪桓大將軍亦曾植樹猶如此我何堪  
莫學江南繫船客雉堞平成天下平有情有思弄春晴

金史卷之八  
卷二  
隔葉睨皖黃鸝聲

玄天妙景歌

光陰過去留駒隙海宇微茫起蜃樓夢境清都真帝所  
仙人一室有天游珠如黍米縣何許掌上胭脂爛不收  
飛佩超然凌倒景擬將變化問洪丘

雪樵

伊川門下已齊腰清苦誰如雪裏樵浩蕩山林行靡靡  
低迷蒼笠影飄飄枯梢一夜號寒墮野菜尋春待凍消

炙手故應猶可恕，高人塵甑儘無聊。  
性夫先生于甲辰六月抄都氏本

題張氏所藏石經

洛溢河清世之季，鈞黨諸賢死無避。橋門冠帶此何時

詔與一作羣經正文字，議郎郎將工隸書。觀者繽紛門

外車，侶憂方用重灰。  
一作煼且可鐫摹辨魯魚，南臺四

部存幾磧，誰見世間完。六籍漢儒區區掇拾方，到今不

是糊塗墨。  
一作客

述懷簡張仲實教授

霜清起病骨臥久忘蘧蔭殘息不暖衣短髮漸入梳涉  
世何用早意適事不如既知非所能裁足不願餘藥苦  
尚可飲家貧難可居秋來窘繁陰百畝沈嘉蔬滯穗尚  
采掇吾生愧耕鋤南窗美朝陽昔賢遺古書風竹如應  
門一室自埽除西庠張公子為我日回車言笑適相娛  
綢繆焉得疏

送楊起行

纓冠楚楚濯滄浪彼美人兮淇水陽大府久須唐令錄

中州正用漢文章忠貞滿眼真能幾  
遲莫相看耿不忘  
至治朝廷天咫尺載歌丞相舉賢良

送秦俗之補南臺掾

南臺禮意特相招送客溪亭自寂寥  
夜雨燈前春幾許清風扇底暑全消  
中司執法分曹掾掌政名官佐使軺  
捧檄還應為親喜宦途等是上雲霄

書閣

以下九首  
俱宣城詩

年華荏苒故客况寂寥新雪融疑是雨  
風和欲近春疎

梅縈小鳳宿藻負潛鱗書閣閒登望時煩載酒人

偶題

宿雨池館淨閒官造請稀石榴朱夏色山鵲青雲飛  
暎矚臨風檻沖襟散暑衣陳編撫芳潤脈脈髮初稀

郡樓

久客有遠思肩輿登郡樓聊為避暑飲更學御風游  
疊翠城南面雙虹水北流流將五湖去葉葉采蘋舟

述懷二首

古道直如矢古心能斷金今人思古人寥落誰知音  
旭日臨前除暄風散幽襟相彼好鳥鳴擇陰嘉樹林  
豈無念朝飢溉之釜與鬻大川無停波高山上歛釜  
白髮何由玄寒暑日夜侵叔孫獨楚製莊生常越  
吟載歌行路難歌闕意彌深

葺荷不用織采蓮尚可食芳時安可常秋風鳴  
械械美人明月璫青霓以為裳手攬北斗柄低昂  
挹天漿天漿解渴心下土何茫茫九牡閭闔開  
寸誠函綠章焉得飛

仙術與陪鸞鶴翔所憂歲年駛敢畏道阻長啓戶辨夜  
色驅車遡晨光終然江海溘臨路空徬徨

次韻劉景初偕陳元佐見訪

松閣啓晨眺東雲白英英空尊媿坐客幽道聞屐聲郊  
墟地自扃林巒暑逾清官居屬冗散朋從多澹成拂塵  
急雨過聯鑣去隄平書味一何長襟期浩已盈挑鐙展  
篇什寤寐山中行

楚雲湘水圖歌謝張師夔教授



離騷之國幾千里十幅蒲帆順風駛順風猶須兩月程  
伊誰移來隋書几張君墨妙游戲爾亂峰因君接天起  
蒼然古木推不死君應曾隱茅屋底得非是間種蘭芷  
慘澹經營那及此松連閣上聽秋聲讀書眼花字如蟻  
玉立長身挾童子披圖置我平生喜憶昔詩家愛許渾  
凌歊荒臺尋舊址云何姑孰大江邊望湘潭雲尺有咫  
我今識君意總為詩料理雲兮楚之雲水兮湘之水迴  
鴈夕陽銜一葦山高見衡岳江遠會南紀君兮君兮可

奈何我詩敢劇屈賈壘

老錢折枝

桃似照脂梨似雪折花人是惜花人折枝圖上堪腸斷  
忍更題詩破費春

泊舟

小舟尋夜泊明月散風瀾故人相別處雙鷺立前灘  
歸

京口省墓天錫出此紙微予書宣城詩記  
憶不甚真天歷二年孟夏二日龔璠識

水邨歌并序

延祐丙辰偶賦此十月七日訪湖天學士遂到  
水邨先生寓居烟水蒼茫間適與此詩相似俾

書

吳中水為鄉人與鳧鷖侶獨欠今年黃梅少時雨農  
不田疇占洲渚鄉風用鉏不用犁築塋踏車兒女妻農  
家辛苦亦復樂高低兩岬互相角自愛茅檐暖莫厭社  
酒薄社前賽神卜東作飯牛何必歌短衣尚可著十年  
種樹樹滿邨明年養蠶蠶百箔

題水邨圖

澤國漁無定，秋霜柳不凋。幽人意晚，此日畫蕭條。

次貢仲章登虎丘韻

遠客喜舊交，相逢乘興游。輕帆不用楫，出郭望林丘。旭  
日時來暑春服，何清脩。涉世儒生腐，尋芳僧寺幽。紅塵  
避人遠，綠陰入山稠。奕奕文翰英，于于江海陬。凭高劇  
弔古，濯纓便臨流。蒸鬱變雷風，倚徙客遲留。取涼盡酒  
尊，霑溼壞詩篝。空濛駕歸舸，起滅波中漚。

天平道中二首

望茶蘼好雪鬢  
蓼暖日和風信去  
帆寂寂餘香花數點  
清波欲動嫩鳧攬

鼓聲依約分魚市  
不負儂家白酒鮮  
秔稻新秧及時插  
芡衣清楚入梅天

胡主簿長孺

長孺字汲仲號石塘  
婺州永康人咸淳中從外  
舅宣撫參議官徐道隆入蜀  
銓試第一授迪功

郎監重慶酒務俄用制置使朱禕孫之辟兼總  
領湖廣軍馬錢糧所僉廳與高彭李湜梅應春  
等號南中八士宋亡退棲永康山中至元二十  
五年元世祖詔下求賢召見京師拜集賢修撰  
改教授揚州移建昌攝錄事官至大元年轉寧  
海主簿延祐元年轉兩浙都轉運鹽使司長山  
場鹽司丞階將仕郎未上以病辭隱杭之虎林  
山卒年七十五所著有石塘文彙五十卷汲仲

為辭章有精魄金春玉撞壹發其和平之音海  
內來求者如購拱壁碑版焜煌照耀四裔趙文  
敏公孟頫稱其天資高爽發言便自超詣常為  
羅司徒奉鈔百錠為潤筆請作乃父墓銘汲仲  
怒曰我豈為宦官作墓銘邪是日正絕糧其子  
以情白坐客咸勸受之汲仲却愈堅其送蔡如  
愚詩云薄糜不繼襖不暝謳吟猶是鐘球鳴語  
之曰此余祕密箴中休糧方也從兄之網之純

皆以經術文學名人稱之為三胡云

題山外歸人

結屋北山阿境趣適有契閒寂聊悅心深密非避世誰  
令賦遠遊山空冷蘭蕙人間萬得喪欣戚隨所制頗似  
觀優伶笑語雜悲涕戲弄刻漏間陳迹安足寄策杖歸  
去來溪深亦朝厲陟嶺見我屋竹柏松杉桂雨餘青一  
色淨埽如作簞行可休此足無言得深詣

題李待詔虎溪三笑圖



元亮纘孔業脩靜研聃玄遠公學瞿曇高居著幽禪人  
異道豈殊萬散一固全目擊輒有得參會各艱然胡為  
老緇褐笑舞喜欲顛漫道遺其身襟袖猶踰蹊彼酣適  
酒趣尚不醒者傳族史浪自苦窺管持知天

題崔錄事女真驄馬圖

天恩洽騎十二閑短策不知行路難漠漠空川望不盡  
電光掣過須臾間蹄高高屈汙溝出駭骨隱隱隆于山  
窟泉沙草不得足勞多食薄心知慚十年甕牖間書瑟

金史卷之二  
卷二  
展卷見圖真太息女真年少面如盤華屋平生隔風日  
青驄肉破擁尻睢黃金校具褻緩拂三品芻豆空自多  
行見火花繞銅歷

贈相士黃電目

憶昔待詔金馬門方伎雜選車蓋繇黃生蔡子最絕出  
高堂不奈笙歌諠廬陵老翁才五尺盱母江頭眼空碧  
相人豈不二子如秋風夜雨歸無宅長身博士老一簞  
皋比那博儒生酸人生榮華無足夢桃笙竹枕長闌干

黃翁勿歎無家苦華屋連雲更何補蜀莊一日不百錢  
炳炳幽光二十年

題段郁文雪石

白雲飛來著春空  
翕霍變化生竒峰  
朝曦照耀舒復卷  
碧華忽擁玻瓈宮  
秋潮初壯明於雪  
千雷動地吳山裂  
濤頭出海夕陽微  
百煉青銅浮玉玦  
雲容濤勢偉且竒  
乍出乍沒須臾時  
乾篤雪山白盈尺  
晴天萬里窺蛾眉  
似識詩翁作詩苦  
獨擁清妍照環堵  
河翻月落夜未央

如虹光氣飛屋梁

題秋江喚渡

道傍木葉如渥丹歸急不知行路難青嶂碧溪自喚渡

蹇驢破帽秋

一作西

風寒裹頭長須甚德色肩輕不借有

餘力人間塵土深復深謹勿重賦招隱吟

題開元三馬圖

牧馬極盛開元中上閑十二皆游龍時平千里不自效  
嘶聲脫吻生悲風流傳八駿苦詭怪樂歌天馬徒能工

豈如杜句曹韓画流雲飛電玉花驄吟詩展卷何獨此  
未可與此爭先雄重瞳玉色五百載堦塌相向將無同  
誰人臨摹得高意印章彷彿龍眦公但存大略見神駿  
未傳五彩分風鬃俯仰布置號進豪圖成欲上明光宮  
安定王孫固英物錦標象軸留其蹤願言葳蕤不浪出  
駿骨隱隱驚盲聾秖今駑駘厭芻豆鹽車未贖汙溝紅

大水

西昆水源出天河一瀉萬里生驚波濁渾到海更奔猛

潰決猶自吞陵阿，瓠子魚龍橫中野。至今空唱宣防歌，  
故跡九道復不得。南注安流少休息，癡冥陰雲欺白日。  
不放扶桑光采出，連宵達旦雨如傾。綠野黃流混為一，  
河伯侈大未可厭。規取桑田廣宮室，長鯨老蛟助聲勢。  
城郭波浪相沈沒，神禹衣冠藏會稽。大叫不聞將安為。

耕漁樂贈金華相士

憶昔力耕金華野，青蓑綠笠風煙下。扶犁荷鋤豈不倦，  
春醅映棧清如寫。亦曾扁舟釣錢唐，長緡短棹浮滄浪。

顛風駕潮濤更惡若比世路猶康莊安有高情唐許協  
深閔神光形亦傑還騎官馬走黃塵江山過眼空重疊  
少年壯氣若不羈西川南海去如馳二毛已非折腰具  
况與志願常參差長官怒罵沸於爚口自唯諾心自忤  
升斗未療飢寒憂低徊獨羨耕漁樂老翁雙瞳秋月如  
何時照我歸鄉閭江湖耕漁樂復樂挂冠徑歸良不惡

送方蓼洲盱江訪上人不遇歸上饒

昨夜秋風顛徹曉沙洲蕭瑟鳴枯蓼羈人荒館夜初長

潑天月色當樓皎老夫思歸又懷祿去住似被飢寒繞  
羨君一語不相投掉臂長塗疾於鳥相知貧士老當遂  
醫識死人危不夭伯牙子期行可遇揚子候芭事更杳

題蘇東坡春帖子詞卷

元祐文忠任詞職毅色正言古遺直農占蠶兆九處三  
宮壺春吟存楮墨周公惻怛陳艱難無逸豳風但耕織  
豐鎬灑澗遥相望八百卜年終不忒陳橋推戴出俄頃  
安得系積同先稷愛人忍詒戢兵端舍已崇儉優民力



弭菑銷變壹以誠三百年餘傳玉食卿材相業富賢良  
講席諫垣多道德通都達宦固廉貞遠縣小官尤謹飭  
君子皓首畢典墳野人黃馘常稼穡祇今真蹟落世間  
象軸鸞標嚴設飾先正已遠不可追空使故臣淚垂臆

題黃山谷三言詩帖

退之出牧向湖州霽色衡山碧欲流魯直宜州遷謫去  
嶽雲九夏滿空浮美哉湘水濁清深洗濯遷人執熱襟  
峰裏雲根不同量解言隨器與渠斟魯直題來務觀題

便云字與漢嘉齊不知楚道經行路不涉祝融峰子西  
次韻段文郁

轉雷飛瀑護遺壇著足危岑向碧煙木末雞啼藤矯矯  
稻間牛過水田田瑤池浪記三千實玉井空傳十丈蓮  
少室幽棲良不惡黃塵山下欲彌天

題風雨漁舟圖

細柳新蒲春已滿飄風急雨亂如顛漁人若解忘魚意  
繫却扁舟卧碧烟

題醉王母圖

宴罷瑤池醉不任  
仙人那有世人心  
良工欲寫無言意  
自托丹青作酒箴

題范文正公書伯夷頌後二首

名並日星真細事  
義參天地在尋倫  
寥寥千古空遺跡  
薇滿西山意自春

伯夷清節韓公頌  
范老銀鈎韓子傳  
屋壁遺書還孔氏  
誰人得似使君賢

竹房先生吾丘衍

衍字子行錢唐人意氣簡傲常自比郭忠恕居  
生花坊一小樓客至僮輒止之通姓名乃使登  
一日廉訪使徐琰來見衍從樓上呼曰此樓何  
敢當貴人登邪願明日謁謝使節琰笑而去生  
徒從衍遊者常數十百人行坐童子地上使冠  
者分番下授之時出小清涼繖教之低昂作舞  
勢或對賓游談大噓解髮濡酒中為戲羣童皆

肅容莫敢動行左目眇又跛右足一俯一仰嫵  
媚可觀畜兩鐵如意日持弄之或倚樓吹洞簫  
數曲超然如忘世者性好譏侮文學士獨推服  
仇遠及胡之純長孺兄弟初行年四十未娶買  
酒家女為妾至大三年秋或訟女為已妻官逮  
女父母會其偽券事覺連及行行固弗知也因  
邏卒辱行行大不勝慚臘月甲子行行持玄條縋  
笠詣仇遠別值晨出因留詩一章竟去不知所

之明日或有得遺履於斷橋上者後衛大隱以  
六壬筮之得亥子丑順流相曰是其骨朽淵泥  
九十日矣多寶院僧可權故從行學為詩聞其  
死哭甚哀招魂葬之西湖上子行工隸書尤精  
於小篆兼通聲音律呂之學詩善倣李賀有竹  
素山房詩竹房竹素貞白皆其號也

龍吟軒

四山若龍盤精廬剡溪曲中有不螯龍長吟破幽綠道

人宴坐起拂袖窗牖開手持碧琅玕聽此風雨來

張伯雨贈黃精

山中有靈草乃云太陽精况聞天老言餌之可長生故人赤松意分贈慰我情玉津比靈芝采采三秀英我願服此久飄然出蓬瀛綠髮無秋霜身如羽翰輕舉臂入霄漢丹臺列高名手把金芙蓉與君遊太清

陳公輔聽雨軒

帝子吟瀟湘瀟湘雲烟竟茫茫楚客歌洞庭洞庭木葉

空秋聲豈如敬亭山前野人宅西風不驚鷺響雲滴燭花  
未翦書在牀愛爾玄音起虛寂忽無復忽有天灑來自  
然山中枕流人如聽洗耳泉神融意適有真趣汝南郭  
泰來何暮忽憶隴頭水罷我膝上琴旅人動遐思無此  
瀟灑心君不聞簷花悲歌杜陵老山雪空回剡溪樵祁  
寒暑雨無怨落流麥漂衢竟誰道與君歌聽雨秋雨最  
可聽明朝雨歇雲亦散月色滿地秋冥冥

玉佩謠



昆吾翦月吹香風鸞絲貫縷聲瓏瓏珠華闌珊舞回步  
宓妃催喚蓬萊宮聯翩鳳帶春風碎曳雨搖雲楚腰醉  
仙人琪樹生晚寒洞中敲折青琅玕

古采蓮

溼風吹花生冷香馮夷為舞水絲裳霏霏粉金飄晚塘  
浮蘭舟鼓桂楫歌采蓮為君發遲遲歸來弄明月

洛城曉

洛陽曉氣浮春空花氣漾暖香濛濛油車碧鈿金駸裏

染露蹴煙移海紅  
回廊複宮洞房隔  
夢入瑤臺買春色  
疊柳蛾眉蜀帳昏  
漫識銅駝錦香陌  
鸞悲鏡舞秋茫茫  
簾移日光春晝長  
春晝長恨春草胡  
蝶飛來鬢先老

別仇山邨

劉伶一鍤事徒然  
胡蝶飛來別有天  
欲語太玄何處問

西泠西畔斷橋邊

按此詩子  
行絕筆也

桃花雨樂府一章寄翼之

秦源春夢陽臺晚  
風散驚紅作秋苑  
閒陰碧樹搖暖雲

茸苔羅水香氤氳蝶飛不濕煙錦路吳娥怨澀鸞階步  
參差海羽雙燕來依微石舞瀟湘回

古詩一首送翼之回吳

游子動歸思南風起秋聲我亦當此時相送難為情交  
朋尚如斯况爾懷父兄三吳亦鄰邦一水非遠程君還  
姑蘇臺我留鳳皇城兩地各相望馳心互奔頌流光若  
頽波彼此即寓萍浮世苦離散輾轉百慮縈何能慰予  
懷握手徒營營

次韻謝錢翼之

筆翰西臺妙文章五鳳樓美才須比玉直道豈如鈞吳  
苑辭春色江風散旅愁吾廬正蕭颯二仲得羊求

菌耳徧沃野

菌耳徧沃野瓊芝亦芬芳羣陰掩其茨誰復知爾良我  
願得此草移根植崇岡閒攀紫金蕤挹露晞朝陽服食  
換綠髓輕舉過紫皇招攜三辰游與之同輝光

與鄰寓人隔屋對月夜話

御寇連牆屋神交得謝瞻

謝有隔屋夜語事

偶逢吾所契共語

月當檐微祿終何補良才尚此淹憑君縱玄論未怪發

幽潛

右故人吾子行手蹟十二紙皆前後得之於書夾所  
藏復恐散落集而存之其為人見石塘胡先生所為  
墓銘茲不書後三十年為至元五年  
己卯九月九日江邗民錢良佑識

雪川翁錢選

選字舜舉號玉潭吳興人宋景定間鄉貢進士  
年少時嗜酒好音聲善画山水師趙令穰人物

師李伯時花木翎毛師趙昌皆稱具體用筆高者至與古人無辨嘗借人白鷹圖夜臨摹裝池翼日以所臨本歸之主人弗覺也趙文敏公孟頫蚤歲從之問画法鄉人經其指授類皆以能画稱至元間吳興有八俊之號以孟頫為稱首而選與焉後孟頫被薦入朝諸人皆相附以取官爵選獨齟齬不合流連詩画以終其身家有習嬾齋因自稱習嬾翁雪川翁清臞老人皆其

別號也黃公望謂舜舉吳興碩學貫串經史人  
品甚高而世往往以画史稱之是特其游戲而  
遂掩其所學斯言可謂深知舜舉者矣

仇書圖

兩兩挾策遊康衢聚戲不異同隊魚忽然兒態起爭競  
捐棄篋笥仇詩書

水仙花園

帝子不沈相亭亭絕世妝曉煙橫薄袂秋瀨韻明璫落

浦應求反姚家合讓王殷勤歸水部雅意在分香

韓左軍馬圖卷

韓公胸次有神奇寫得天閑八尺駒曾為歧王天上賜  
不隨都護雪中驅霜蹄奮迅追飛電鳳首昂藏似渴烏  
春草青青華山曲三邊今日已無虞

題浮玉山居圖

瞻彼南山岑白雲何翩翩下有幽棲人嘯歌樂徂年叢  
石映清泚嘉木澹芳妍日月無終極陵谷從變遷神襟



軼寥廓興寄揮五絃塵影一以絕招隱奚足言

吳興公蚤歲得画法于舜舉舜舉多寫人物花鳥故  
所圖山水當世傳罕此卷蓋其自寫山居景趣既高  
筆墨精妙尤為合作詩亦雅麗非近人語僕以戊子  
秋七月得于書肆如獲古圖史云因次韻識歲月于  
后秋風動巖樹歸鳥何其翩我思巖中人可以樂忘  
年夫若乃詞客画手故作妍吳興圖画藪詎隨時好  
邊上巖雲積雪下巖水鳴弦展卷纔尺許坐對兩  
無言山澤懼者張雨題于開元靜舍之浴鵝灣

題桃源圖

始信桃源隔幾秦後來無復問津人武陵不是花開晚  
流到人間却暮春

題山水卷四首

目窮千里筆不到自是餘生坐太凡一日興來何可遏  
開窗寫出碧崑崙

江南北苑出奇才千里溪山筆底回不管六朝興廢事  
一樽且向畫圖開

煙雲出沒有無間半在空虛半在山我亦閒中消日月  
幽林深處聽潺湲

胸中得酒出孱顏木葉森森歲暮殘落墨不隨嵐氣暝

幾重山色幾重瀾

題洪厓先生像卷

神駕馭景飈太虛時總轡玄道不可分直悟天人際羣  
從皆成仙玩世不計年何當事神遊許我笑拍肩

題竹林七賢圖

昔人好沈酣人事不復理但進杯中物應世聊爾爾悠  
悠天地間媮樂本無媿諸賢各有心流俗毋輕議

題宮姬戲嬰圖

殿閣森森氣自清，不知人世有蓬瀛。  
日長無事宮中樂，閒與諸姬伴戲嬰。

題秋茄圖

憶昔毗山愛寫生，茄任我筆縱橫。  
自憐老去翻成拙，學圃今猶學不成。

題秋江待渡圖

山色空濛翠欲流，長江清澈一天秋。  
茅茨落日寒煙外，久立行人待渡舟。

雪溪翁雪霽望弁山圖

并引

至元二十九年余留太湖之濱雪霽舟行溪上  
西望弁山作此圖且賦詩云

弁山之陽冠吳興嵒嶙巖嶭望不平煥然仙宮隱其下  
衆山所仰青復青雪花夜積山如換乘興行舟須放緩  
平生不識五老峰且寫吾鄉一奇觀

是日汎舟歸湖濱至夜雪大作旦起賦五言古體

一首

夜來天雨雪萬木同一變  
飢鷄覺余起觀覽立須儼  
遙

山瓊成積平田玉如碾  
老夫醒眼看樹樹何其燦  
至元二十

九年冬余假弁山佑聖宮一室以避喧值雪作不已但閉門擁爐飲酒賦詩而已聊記數篇附見於此卷書試馮應科筆亦佳選重題

### 五言古體一首

城市我所居遙看弁山雄  
積雪最先見皓彩照諸峰  
我今遠城市薄遊留此中  
忽焉歲云暮更覺尊屢空  
開門未然燭飛花舞迴風  
萬木同一縞四野變其容  
恨無登

山屐幽討何由窮

七言律詩一首

倚天蒼弁獨崔嵬  
仙闕遨遊媿不才  
攬鏡頻嗟雙鬢改  
推窗三見六花開  
山中酒戶衝寒去  
城裏行人蹋雪來  
安得時晴風日好  
竹林深處且銜杯

連雪可畏再賦律詩一首

階簷積雪動經旬  
猶自霏霏夜向晨  
四望至莫分天地色  
一時逸盡海山塵  
舞風不住緣何事  
見日還銷亦快人

獨欠故交來叩戶洛中高臥是前身

雪晴知宮周濟川和余杯字韻詩作此奉酬

亂山積雪鬱崔嵬對景慚無倡和才晴日舊曾梅下飲  
好懷今為竹林開仙人千劫能居此俗客三生始一來  
未許扁舟落我手明朝相約共傳杯

七言絕句三首

子猷安道何為者自是相忘意最真千載寥寥風雪夜  
始知乘興更無人



一冬飛雪又將春能報年豐不救貧我亦曾聞散花手  
不知天女意何勤

眼前觸物動成冰凍筆頭枯字不成獨坐火爐煨酒喫  
細聽撲簌打窗聲

山居圖卷

山居惟愛靜白日掩柴門寡合人多忌無求道自尊  
鷗鵬俱有意蘭艾不同根安得蒙莊叟相逢與細論  
此余年少

時詩近留湖濱寫山居圖追憶舊吟書於卷末揚  
子雲悔少作隱居乃余素志何悔之有吳興錢遜

歸去來圖

衡門植五柳東籬采叢菊長嘯有餘清無奈酒不足當  
世宜沈酣作色召侮辱乘興賦歸歟千載一辭獨

立雪先生劉清叟

清叟字立雪江西人少年才氣卓犖連蹇不第  
中更世故感頽悲吟鰥居隱處年踰七十而終  
同門生鄧光薦序其第五彙曰余嘗評君一生  
琢對匠語洗削治擇齒牙間纚纚有聲大率成

就精切二字而已今皮毛落盡孤立兀然雷霆  
之琴火成之鑿潮湍激蓄之山皆自然成趣有  
不假繩削而合蓋於是門外雪三尺矣得其髓  
者非齊腰子不能今讀其遺橐如見率齋王廉  
使云盡起綺園山箇裏更招溫石水之涯和率  
齋云送酒馬軍江上去持書驛使隴頭來上尚  
郎中云為役誰憐燭之武浮言枉累鐵元城造  
語信為精切

醉題月亭

采石江頭李太白狂不奈煩宮錦窄赤壁磯下蘇東坡  
一葉泛泛凌風波當時有月并有酒和酒和月吞入口  
酒腸得月冷於冰化作瑰辭喧宇宙兩首賦百篇詩千  
秋萬古稱絕奇兩翁不作歸來鶴玉宇瓊樓寒漠漠若  
得長江變潑醅少住人間亦差樂望圓晦缺秋復春古  
來明月今來人我時舉酒問明月月亦團團應不得鐵  
如意玉唾壺我歌君和聲嗚嗚爛醉起舞嗔人扶問影

莫是李與蘇月中仙子知得無

登黃鶴樓

西風吹我登黃鶴白雲半在闌干角題詩不見舊時人  
惟見青山俯城郭萋萋芳草鸚鵡洲江水衮衮來無休  
歲月俯仰成春秋古人今人無限愁

梅四首

休說逋仙兩句工冰甌滌筆別形容清標騷客風前立  
素面仙姝月下逢山店霜寒香撲馬溪橋水淺影如龍

一闕盡是寒凝結金鼎無鹽味更濃

破荒玉雪粲煙邨倚竹無言獨斷魂  
三弄直須琴對越  
一寒安用酒溫存家風巢許堪同社  
心事夷齊可共論  
應出繽紛幾紅紫一枝開處自乾坤

除香除影賦梅花方許詩中擅作家  
怕俗似嫌羔作酒  
高人頗稱雪煎茶參橫屋角霜初下  
人倚闌干月欲斜  
夜冷玉肌愁入骨金壺移入伴窗紗

天花夜半落溪傍  
傍有猗然為取將  
擎手爪仰空呈潔白

掀顛倒地覓昏黃  
修鱗月下霜同色  
敗甲風前雪有香  
欲起補之圖影看  
生愁飛入水中藏

書燈

一點蘭膏數寸心  
小窗伴我夜沈沈  
煖分青燄藜煙細  
喜動紅光花意深  
洞見苦心歸典策  
照殘幽夢入寒衾  
他時富貴不相棄  
移上長檠伴醉吟

題靜軒

徑深寂寂鎖苔茵  
此地不生車馬塵  
夢斷瑤臺惟有竹

碁聲花院似無人  
蛛因門閉牢穿網  
鵲悟枝乾自采薪  
祇道乾坤大如許  
不知天地又新春

寄朱約山

歲晚江空煙水寒  
楓林葉落楚天寬  
若無鴈足書難寄  
作盡鶯聲吟未安  
晉帖臨成思入石  
離騷讀罷擬栽蘭  
老來絕被梅花惱  
後會君應笑我孱

見提舉蔡澗松

今人標致古心曾  
吉士依歸有澗松  
白髮半頭身欲鶴



蒼顏千丈氣如龍三年博士留韓愈十載中郎老蔡邕  
根脚青原培植久蓬萊行上最高峰

見率齋王廉使

平生怪怪復奇奇一字何曾樂得飢太白枉承金殿召  
浩然空負玉堂知田園僅了都人役事業全拋進士詩  
白髮見公增感慨深衣重有道行時

謁蕭大山

阿統遙知是迺宗作詩工似選詩工寫成判語皆吟筆

翻作離騷再國風共喜橫渠傳有弟久誇坡老學如翁  
世間師友多零落今在庭闈諾唯中

上尚郎中

因打勘  
船鐵

六合陰沈一樣雲行人白晝亦黃昏貪財更似方山犬  
逃命民如入峽猿典到琴書猶小事賣拋田產更銷魂  
先生明共霜臺月照徹茅檐幾淚痕

賀周總管耐軒遷居回任二首

就第開藩自古難旌門累世況團圞肯邀父老為鄰舍

更約交游說歲寒千里春風棠蔽芾一窗秋月竹平安  
鄉人鄉飲推鄉貴祇作平時様子看

袖詩兩度出山扉到得城來與願違南浦綠波凝望久  
東山零雨喜公歸疎梅鬪雪增新潔喬木參天長舊圍  
重對門牆簾定卷春風賀厦燕依栖

月巖

世事從來滿則虧十分何似八分時青山作計常千古  
只露巖前月半規


書燈

玉樓夜費燭熒熒祇得眼前歌舞明照破三千年外事  
書生元不用長檠

謁蕭小山二絕

一冬晴暖春相似欲叩吟闌未有詩折得梅花裝擔了  
起程還是雪飛時

一水凝寒棹不開幾人於此欲船回思君却有扁舟興  
半夜直衝風雪來



元詩選二集卷二